

(钦定)平定七省方略

北京中国书店印行



欽定平定陝甘新疆回匪方略卷二百八十六 癸酉年

十二月二十二日 丙申 左宗棠奏言肅州克復大

軍應卽乘勝出關速圖掃蕩惟 臣 體察軍情詳

審局勢有不能不豫籌者請爲

皇上敬陳之一出關之兵宜審也通計攻肅各軍金順

宋慶徐占彪及 臣 節次調派馬步各起多至六

十餘營攻堅旣久損折精銳實多受傷成廢者

亦不下數千 臣與諸軍熟商非從新整理難收

實效金順宋慶徐占彪均以爲然乃飭隨帶之
總兵戴宏勝余起立提督金慶元副將歐陽吉
星等歸記名提督譚上連續領併成五營並以
馬步三營駐守肅州修葺城壕俾成雄鎮飭肅
州鎮總兵章洪勝接統楊世俊舊部馬步四營
及親兵步隊駐嘉峪關重修邊城以嚴鎖鑰並

撥馬步小隊分駐關外以通玉門之氣其玉門
靖逆營遊擊缺委隨營副將陳南波署理安西
協副將缺委隨營提督吳次漢署理敦煌沙州
營參將缺委隨營副將聶福田署理各令挑汰
存營孱弱兵丁而募山內獵戶補之各足一營
五百名實數照內地募勇章程給以月餉責其
防守本境兼護運道而緝游勇臣巡視嘉峪關

回肅撤徐占彪馬步七營分別回籍挑留精壯
併成馬步六營於肅城外擇水草便利處屯紮
按月操練時因出關期近諸軍整理需時奏調
張曜嵩武軍由鎮番涼州赴肅而嵩武軍到肅
後軍食日增甘涼訂買運肅之糧不敷接濟不
得已商請宋慶率所部回涼州整理兼以就食
宋慶又以舊部在豫者多募補易於集事並因

金順出關在卽願以所部現在精壯先儘金順
挑補額數俾期捷便臣服其力顧大局深知緩
急旋拔副將馮桂增馬隊一營並飭總兵鄧增
運帶開花大礮一尊酌量挑選礮手隨金順出
關以從其志計此時整理就緒壁壘一新矣張
曜一軍馬步十四營隊伍整肅士飽馬騰堪稱
勁旅臣並益以新製連架劈山礮十尊布洛斯

二號螺絲後膛礮一尊七響後膛礮十桿其涼
州副都統額爾慶額馬隊除自挑涼州滿營百
騎外穆圖善撥交吉林二百騎黑龍江一百騎
臣慮其單飭總兵桂錫楨帶所部馬隊一營約
四百騎歸其統帶計金張額三軍出關馬步共
一萬數千人皆精實可用數月而後仍可調撥
勁軍陸續繼進如此士氣常新而不竭糧運常

裕而不飢以之制關外客土逆回自操十全之
算一出關之糧運宜審也肅州安西共隸一道
而產糧贏絀各屬攸殊肅州及高臺腴地也安
西玉門頗多砂瘠而敦煌爲上腴軍興以來民
人存者不過十之三四地畝荒廢居其大半臣
在肅見難民絡繹入關亟籌銀二萬兩分給三
州縣並撥寒衣萬套賑之冀留此灾黎盡力屯

聖庶異時餘糧出糶關外各軍可就近採買稍
節勞費然目前軍食固不能取給安西甘涼肅
素稱腴地頻年戎馬被害最酷自徐占彪偏師
徑擣肅州肅回退縮諸軍戡定河湟甘涼道路
漸次肅清農民得安耕穡倖獲中稔兩年以來
藉供官軍採買然死亡旣多川原耕種不過十
之三四其旱地更無過問者

臣由蘭到肅途聞

疊據士民紛紛遞呈求免採買皆經再三開導
除留民食及籽種外諭其悉數出糶勿任居奇
幸三郡民情樸愿又知官軍誓滅此賊且能不
擾遂得積有成數通計涼甘肅三郡定買市斗
軍糧十六萬三千餘石按照額徵倉斗則三十
餘萬石幾敵通省半年額賦然以訂買糧料總
數供金順張曜額爾慶額三軍食用及運糧車

馱駝隻防營所需食用算至明歲六月尙短糧
料市斗二萬餘石現擬盡括額徵本色及各標
營季糧陸續填補尙未知能否足數且甘肅地
氣高寒麥秋雖在六月而民間交納新糧須至
八月尙應寬籌兩月陳糧庶新熟之交得資接
濟此籌糧艱苦實在情形也就轉運言之自涼
州至肅州共九百里又自肅州出嘉峪關至玉

門縣三百六十里玉門至塞西又二百里共計
一千四百餘里路多沙石用駝爲宜臣於夏初
派弁三路出口採買駝三千隻偏值蒙古駝少
價昂採買尙不及半報到者僅祇六百餘隻臣
過甘郡時道府請重價雇用民車每運糧百斤
行百里許給銀四錢其應出差車許給銀二錢
計四十餘日之久民車差車運料到局尙不滿

三千石幸臣前調各營官騾一千六百餘頭先後到齊起運勉資周轉並在蘭州平涼所雇商民車馱駝隻及袁保恆在河南雇辦車輛亦陸續搭運軍裝軍火抵甘於是轉運稍旺肅州乃有存糧然通計由涼州甘州採糧運肅由肅駝運至安西州一切攤算每糧百斤需銀十一兩七錢內外勞費如此夫豈此時財力所能堪非

豫籌樽節而動言用衆恐官軍之餉饋不繼糴
臺之儲峙早空不但後時不能保此不竭之源
卽目前出關之師亦且時憂飢潰此轉運艱苦
之實在情形也 臣愚以爲師行萬里在精不在
多今擬出關之師張曜一軍銳氣方新作爲頭
起金順一軍次之額爾慶額又次之宋慶一軍
整理需時軍裝駝隻均須增添購辦請留俟明

年秋後繼發臣並擬於所部諸軍內再精選數營屆時慎擇統將率之同行如天之福甘涼安肅明歲豐稔西師飽騰再分起層遞而前庶邊塞肅清可操全算至關外軍事除景廉每年尙有緘牘餘則並未接過隻字卽鎮迪一道名雖隸陝甘總督管轄而實則由烏魯木齊都統及各大臣就近督率公事一切由其主持臣無從

過問所有哈密以西糧運事宜應由出關各軍
到彼自行籌畫臣實未能懸揣此勢力所不逮
非豫爲諉卸也

左宗棠又奏言臣奉

諭旨垂詢河州狄道回情是否安帖暨臣督辦糧運駐
紮肅州蘭州省城祇有藩臬駐紮是否足恃西
甯安插各回衆能否不滋事端令臣據實具奏